

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренијси савјет

**Zaključak o odbacivanju Prijave koncentracije
privrednog subjekta "G-Petrol" d.o.o. Sarajevo**

**Sarajevo,
oktobar 2018. godine**



Broj: UP-05-26-1-024-12/18
Sarajevo: 18.10.2018. godine

Konkurencijsko vijeće Bosne i Hercegovine, na osnovu člana 25. stav (1) tačka e) i člana 42. stav (2), a u vezi sa članovima 12, 14. i 16. Zakona o konkurenciji ("Službeni glasnik BiH", br. 48/05, 76/07 i 80/09), rješavajući po Prijavi koncentracije privrednog subjekta "G-Petrol" d.o.o. Sarajevo, ul. Tešanjka br. 24a, *Avaz Twist Tower*, Centar, 71000 Sarajevo, zaprimljenoj dana 30.07.2018. godine pod brojem: UP-05-26-1-024-1/18, na 39. (tridesetdevetoj) sjednici održanoj dana 18.10.2018. godine, je donijelo

ZAKLJUČAK

- 1) Odbacuje se Prijava koncentracije privrednog subjekta "G-Petrol" d.o.o. Sarajevo, ul. Tešanjka br. 24a, *Avaz Twist Tower*, 71000 Sarajevo, radi nepostojanja koncentracije u smislu člana 12. Zakona o konkurenciji.
- 2) Ovaj Zaključak bit će objavljen u "Službenom glasniku BiH", službenim glasilima entiteta i Brčko distrikta Bosne i Hercegovine.

O b r a z l o ž e n j e

Konkurencijsko vijeće Bosne i Hercegovine (u daljem tekstu: Konkurencijsko vijeće) je dana 30.07.2018. godine, pod brojem: UP-05-26-1-024-1/18, zaprimio Prijavu koncentracije (u daljem tekstu: Prijava) privrednog subjekta "G-Petrol" d.o.o. Sarajevo, ul. Tešanjka br. 24a, *"Avaz Twist Tower"*, Centar, 71000 Sarajevo, ujedno i podnosioca Prijave (u daljem tekstu: "G-Petrol" ili podnosilac Prijave), privrednog subjekta "NIS PETROL" d.o.o. Banja Luka, ul. Kralja Nikole br. 26, 78000 Banja Luka (u daljem tekstu: "NIS PETROL") i privrednog subjekta "OKTAN PROMET" d.o.o. Bijeljina, ul. Sremska br. 2, 76300 Bijeljina (u daljem tekstu: "OKTAN PROMET").

Prijava se odnosi na kupovinu dijelova (poslovnih jedinica) privrednog subjekta "OKTAN PROMET" od strane privrednog subjekta "G-Petrol" i to kupovinom 100% vlasničkog udjela u benzinskoj stanici Trnjaci, Trnjaci, 76300 Bijeljina (u daljem tekstu: "BS Trnjaci"), benzinskoj stanici Popovi, Pavlovića put bb, Popovi, 76300 Bijeljina (u daljem tekstu: "BS Popovi") i Naftnom terminalu za trgovinu na veliko tečnim gorivima i njihovo uskladištenje i pretakanje u Popovima, Pavlovića put bb, Popovi, 76300 Bijeljina (u daljem tekstu: "Terminal Popovi").

Uvidom u svu dostavljenu dokumentaciju, utvrđeno je da Prijava nije potpuna i kompletna u smislu člana 30. stav (1) Zakona konkurenciji (u daljem tekstu: Zakon) i članova 9-12. Odluke o načinu podnošenja prijave i kriterijima za ocjenu koncentracija privrednih subjekata ("Službeni glasnik BiH", broj 34/10), te je Konkurencijsko vijeće u skladu sa članom 31. Zakona, aktom broj: UP-05-26-1-024-2/18 od 27.08.2018. godine i aktom broj: UP-05-26-1-024-4/18 od 05.09.2018. godine zatražilo dopunu iste.

Podnosilac Prijave je podnescima koje je Konkurencijsko vijeće zaprimilo pod brojevima: UP-05-26-1-024-3/18 od 30.08.2018. godine, UP-05-26-1-024-5/18 od 07.09.2018. godine, UP-05-26-1-024-6/18 od 12.09.2018. godine, UP-05-26-1-024-7/18 od 21.09.2018. godine, UP-05-26-1-024-8/18 od 26.09.2018. godine i UP-05-26-1-024-9/18 od 02.10.2018. godine, dopunio Prijavu traženom dokumentacijom.

Podnosilac Prijave je, u smislu člana 30. stav (2) Zakona, naveo da zahtjev za ocjenu predmetne koncentracije nije podnio ni jednom drugom tijelu izvan Bosne i Hercegovine.

Nakon analize dokumentacije koju je dostavio podnosilac Prijave, Konkurencijsko vijeće je dana 16.10.2018. godine pod brojem: UP-05-26-1-024-10/18, izdalo Potvrdu o prijemu kompletne i uredne prijave, u smislu člana 30. stav (3) Zakona.

Konkurencijsko vijeće je u postupku ocjene dopuštenosti predmetne transakcije utvrdilo sljedeće činjenice:

1. Učesnici predmetne transakcije

Učesnici transakcije su privredni subjekt "G-Petrol" d.o.o. Sarajevo, ul. Tešanjka br. 24a, "Avaz Twist Tower", Centar, 71000 Sarajevo, njegovo povezano društvo privredni subjekt "NIS PETROL" d.o.o. Banja Luka, ul. Kralja Nikole br. 26, 78000 Banja Luka i privredni subjekt "OKTAN PROMET" d.o.o. Bijeljina, ul. Sremska br. 2, 76300 Bijeljina.

1.1. Privredni subjekt "G-Petrol" (podnosilac Prijave)

Privredni subjekt "G-Petrol", punim nazivom G-Petrol društvo sa ograničenom odgovornošću Sarajevo, ima sjedište na adresi ul. Tešanjka br. 24a, "Avaz Twist Tower", Centar, 71000 Sarajevo.

Privredni subjekt "G-Petrol", prema aktuelnom izvodu iz sudskog registra Općinskog suda u Sarajevu broj: 065-0-RegZ-18-004404 od 01.06.2018. godine, upisan je pod matičnim brojem: 65-01-0638-11 (stari broj 1-26336) i JIB-om: 4209277550009, sa pretežnom registrovanom djelatnosti trgovine na malo motornim gorivima u specijaliziranim prodavnicama i trgovine na veliko krutim, tečnim i plinovitim gorivima i srodnim proizvodima.

Vlasnik privrednog subjekta "G-Petrol" sa 100,0% vlasničkog udjela je privredni subjekt "NIS PETROL".

Privredni subjekt "G-Petrol" nema povezanih društava u Bosni i Hercegovini u kojima ima 10,0% ili više udjela u osnovnom kapitalu ili 10,0% ili više prava glasa, a koji se bave djelatnošću trgovine na veliko i malo naftnim derivatima.

1.2. Privredni subjekt "NIS PETROL"

Privredni subjekt "NIS PETROL", punim nazivom NIS PETROL Društvo sa ograničenom odgovornošću Banja Luka, ima sjedište na adresi ul. Kralja Nikole br. 26, 78000 Banja Luka.

Privredni subjekt "NIS PETROL", prema aktuelnom izvodu iz sudskog registra Okružnog privrednog suda u Banja Luci broj: 057-Reg-Z-17-002859 od 04.07.2017. godine, upisan je pod matičnim brojem: 57-01-0235-11 i JIB-om: 4403359860007, sa pretežnom registrovanom djelatnosti trgovine na veliko čvrstim, tečnim i gasovitim gorivima i sličnim proizvodima, s tim da je do 13.11.2017.

godine kao predmet poslovanja imao i djelatnost trgovine na malo motornim gorivima u specijalizovanim prodavnicama, ali je od dog datuma više nema.

Vlasnik privrednog subjekta "NIS PETROL" sa 100,0% vlasničkog udjela je privredni subjekt Društvo za istraživanje, proizvodnju, preradu, distribuciju i promet nafte i naftnih derivata i istraživanje i proizvodnju prirodnog gasa "Naftna industrija Srbije" a.d. Novi Sad, ul. Narodnog fronta br. 12, 21000 Novi Sad, Republika Srbija (u daljem tekstu: "NIS").

Povezano društvo privrednog subjekta "NIS PETROL" u kojem ima 10,0% ili više udjela u osnovnom kapitalu ili 10,0% ili više prava glasa na teritoriji Bosne i Hercegovine je privredni subjekt "G-Petrol" u kojem posjeduje 100% vlasničkog udjela. Pored njega privredni subjekt "NIS PETROL" ima još jedno povezano društvo koje se bavi sličnom djelatnošću na teritoriji Bosne i Hercegovine. Radi se o privrednom subjektu "Jadran Naftagas" d.o.o. Banja Luka, koji obavlja djelatnost na tržištu istraživanja i proizvodnje nafte i gasa, a koje je povezano preko privrednog subjekta "NIS", koji u njemu ima 66% vlasničkog udjela.

1.3. Privredni subjekt "OKTAN PROMET"

Privredni subjekt "OKTAN PROMET", punim nazivom Društvo sa ograničenom odgovornošću za proizvodnju, trgovinu i usluge "OKTAN PROMET" Bijeljina, ima sjedište na adresi ul. Sremska br. 2, 76300 Bijeljina.

Privredni subjekt "OKTAN PROMET", prema aktuelnom izvodu iz sudskog registra Okružnog privrednog suda u Bijeljini broj: 059-0-RegZ-18-001259 od 20.06.2018. godine, upisan je pod matičnim brojem: 59-01-0114-14 (1-593) i JIB-om: 4400387440006, sa pretežnom registrovanom djelatnosti: hladno vučenje žice, proizvodnja armaturnih mreža, proizvodnja savitljivih cijevi i vratila, te izdavanje vlastitih nekretnina u zakup.

Privredni subjekt "OKTAN PROMET" od 2012. godine kao predmet poslovanja nema trgovinu na malo motornim gorivima u specijalizovanim prodavnicama, a trgovinu na veliko čvrstim, tečnim i gasovitim gorivima i sličnim proizvodima, nikada nije imao.

Vlasnik privrednog subjekta "OKTAN PROMET" sa 100,0% vlasničkog udjela je fizičko lice Nela Mitrović, ul. Sofke Nikolić br. 37, 76300 Bijeljina.

Privredni subjekt "OKTAN PROMET" nema povezanih društava u Bosni i Hercegovini u kojima ima 10,0% ili više udjela u osnovnom kapitalu ili 10,0% ili više prava glasa, a koji se bave djelatnošću trgovine na veliko i malo naftnim derivatima.

Povezana društva privrednog subjekta "OKTAN PROMET" u kojima ima vlasničke udjele, a koja se bave drugim djelatnostima su:

- 1) Privredni subjekt "Komunalac" a.d. Bijeljina, ul. Miloša Crnjanskog br. 7, 76300 Bijeljina, sa vlasničkim udjelom od 29,85%, koji kao predmet poslovanja ima sakupljanje i odvoz komunalnog otpada.
- 2) Privredni subjekt "POŠTE SRPSKE" a.d. Banja Luka, ul. Kralja Petra I Karađorđevića br. 93, 78000 Banja Luka, sa vlasničkim udjelom od 2,05%, koji kao predmet poslovanja ima otpremu i transport pošiljki.
- 3) Privredni subjekt Poljoprivredno dobro "Semberija" a.d. Bijeljina, Novo Selo bb, 76300 Bijeljina, sa vlasničkim udjelom od 0,64%, koji kao predmet poslovanja ima poljoprivrednu djelatnost.

2. Pravni osnov predmetne transakcije

Pravni osnov transakcije je Ugovor o kupoprodaji i osnivanju stvarne službenosti puta OPU br. 1496/2018, zaključen dana 27.07.2018. godine između privrednog subjekta "G-Petrol" kao kupca i privrednog subjekta "OKTAN PROMET" kao prodavca (u daljem tekstu: kupoprodajni ugovor), a odnosi se na prodaju više nekretnina, u koje između ostalog spadaju "BS Trnjaci", "BS Popovi" i "Terminal Popovi". Navedeni ugovor, kao i sve ostale ugovore i anekse istih koji su između sebe zaključili učesnici transakcije, a koji se navode u ovom Zaključku notarski je obradila notar Milka Đaković, ul. Karađorđeva bb, 78250 Laktaši.

3. Ocjena predmetne transakcije

Konkurencijsko vijeće je analiziralo podatke iz Prijave, kao i druge dostupne podatke i utvrdilo da su na benzinskim stanicama "BS Trnjaci" i "BS Popovi" u periodu od 01.08.2012. godine pa do 27.07.2018. godine, kada je zaključen kupoprodajni ugovor, poslovnu djelatnost obavljali privredni subjekti "G-Petrol" i "NIS PETROL".

Privredni subjekt "NIS PETROL" je dana 01.08.2012. godine zaključio ugovore o zakupu benzinskih stanica "BS Trnjaci" (OPU br. 1459/2012) i "BS Popovi" (OPU br. 1460/2012) na period od pet godina sa privrednim subjektom "OKTAN PROMET". Predmetni ugovori su bili dio pravnog osnova za podnošenje prijave koncentracije, koju je privredni subjekt "NIS PETROL" podnio Konkurencijskom vijeću i koja je zaprimljena dana 13.08.2012. godine pod brojem: 03-26-1-009-II/12. Navedena prijava koncentracije je odobrena od strane Konkurencijskog vijeća rješenjem broj: 03-26-1-009-5-II/12 od 04.09.2012. godine, kojim je odobrena i koncentracija benzinskih stanica "BS Trnjaci" i "BS Popovi" od strane privrednog subjekta "NIS PETROL".

Zakup benzinske stanice "BS Trnjaci" od strane privrednog subjekta "NIS PETROL" zaključen ugovorom od 01.08.2012. godine produžavan je aneksom br.1, UG-N-4792/17/A1 zaključenim 06.11.2017. godine, sa rokom do 31.12.2017. godine, aneksom br.2, UG-N-52/18/A2 zaključenim 04.01.2018. godine, sa rokom do 30.06.2018. godine i aneksom br.3, UG-N-2366/18/A3 zaključenim 11.07.2018. godine, sa rokom do momenta potpisivanja kupoprodajnog ugovora, a najdalje do 31.12.2018. godine.

Privredni subjekt "NIS PETROL" dao je benzinsku stanicu "BS Trnjaci" u podzakup privrednom subjektu "G-Petrol" ugovorom UG-N-4929/17 (UG-539/17) zaključenim 13.11.2017. godine, sa rokom do 31.12.2017. godine, a koji je produžavan aneksom br.1, UG-N-102/18/A1 (UG-11/18) zaključenim 18.01.2018. godine, sa rokom do 30.06.2018. godine i aneksom br.2, UG-N-2437/18/A2 (UG-498/18) zaključenim 18.07.2018. godine, sa rokom do momenta potpisivanja kupoprodajnog ugovora, a najdalje do 31.12.2018. godine.

Prema navedenim podacima, na benzinskoj stanici "BS Trnjaci" privredni subjekt "NIS PETROL" obavljao je poslovnu djelatnost od 01.08.2012. godine pa sve do 13.11.2017. godine od kada poslovnu djelatnost obavlja privredni subjekt "G-Petrol", koji je i trenutno obavlja.

Zakup benzinske stanice "BS Popovi" od strane privrednog subjekta "NIS PETROL" zaključen ugovorom od 01.08.2012. godine produžavan je aneksom br.1, UG-N-4793/17/A1 zaključenim 06.11.2017. godine, sa rokom do 31.12.2017. godine, aneksom br.2, UG-N-51/18/A2 zaključenim 04.01.2018. godine, sa rokom do 30.06.2018. godine i aneksom br.3, UG-N-2365/18/A3 zaključenim 11.07.2018. godine, sa rokom do momenta potpisivanja kupoprodajnog ugovora, a najdalje do 31.12.2018. godine.

Privredni subjekt "NIS PETROL" dao je benzinsku stanicu "BS Popovi" u podzakup privrednom subjektu "G-Petrol" ugovorom UG-N-4930/17 (UG-540/17) zaključenim 13.11.2017. godine, sa rokom do 31.12.2017. godine, a koji je produžavan aneksom br.1, UG-N-103/18/A1 (UG-12/18) zaključenim 18.01.2018. godine, sa rokom do 30.06.2018. godine i aneksom br.2, UG-N-2436/18/A2 (UG-497/18) zaključenim 18.07.2018. godine, sa rokom do momenta potpisivanja kupoprodajnog ugovora, a najdalje do 31.12.2018. godine.

Prema navedenim podacima, na benzinskoj stanici "BS Popovi" privredni subjekt "NIS PETROL" obavljao je poslovnu djelatnost od 01.08.2012. godine pa sve do 13.11.2017. godine od kada poslovnu djelatnost obavlja privredni subjekt "G-Petrol", koji je i trenutno obavlja.

U skladu sa navedenim, utvrđeno je da kupovinom dijelova privrednog subjekta "OKTAN PROMET", benzinskih stanica "BS Trnjaci" i "BS Popovi", od strane kupca privrednog subjekta "G-Petrol", nije došlo do koncentracije privrednih subjekata, s obzirom da nisu ispunjeni uslovi koje propisuje član 12. Zakona. Naime, u predmetnom slučaju radi se o koncentraciji koja je nastala dana 01.08.2012. godine zaključenjem ugovora o zakupu "BS Trnjaci", "BS Popovi" od strane privrednog subjekta "NIS PETROL" i koja je kao takva odobrena od strane Konkurencijskog vijeća. Od momenta nastanka koncentracije, pa do zaključenja kupoprodajnog ugovora koji je bio pravni osnov za podnošenje Prijave, nije bilo promjene kontrole nad navedenim benzinskim stanicama. Ovo dokazuje činjenica da su poslovnu djelatnost na navedenim benzinskim stanicama tokom cijelog perioda obavljali privredni subjekti "NIS PETROL" i "G-Petrol", koji pri tom nisu nezavisni privredni subjekti, nego povezana društva, kod kojih se privredni subjekt "G-Petrol" nalazi pod kontrolom privrednog subjekta "NIS PETROL", na način kako to propisuje član 2. stav (2) Zakona.

Što se tiče naftnog terminala "Terminal Popovi", Konkurencijsko vijeće je utvrdilo da je Ugovorom o zakupu poslovnog prostora za trgovinu na veliko tečnim gorivima i njihovo uskladištenje i pretakanje-naftni terminal OPU br. 29/2016, zaključenim dana 08.01.2016. godine između privrednog subjekta "OKTAN PROMET" kao zakupodavca i privrednog subjekta "G-Petrol" kao zakupca, isti uzet u zakup od strane privrednog subjekta "G-Petrol" na period od sedam godina.

Privredni subjekt "G-Petrol" je Ugovorom o podzakupu poslovnog prostora za trgovinu na veliko tečnim gorivima i njihovo uskladištenje i pretakanje-naftni terminal UG-N-139/16 (090-0259/16) zaključenim dana 29.01.2016. godine, dio poslovnog prostora na naftnom terminalu "Terminal Popovi" izdao u podzakup privrednom subjektu "NIS PETROL" na period od sedam godina. Na ovaj ugovor sačinjena su dva aneksa koji su se odnosili samo na predmet zakupa (količinu rezervoara koji se izdaju u podzakup), a radi se o aneksu br.1 UG-N-405/16 (090-645/16) zaključenim 10.03.2016. godine i aneksu br.2 UG-N-671/17/A2 (090-477/17) zaključenim 20.02.2017. godine.

Prema navedenim podacima, na naftnom terminalu "Terminal Popovi" privredni subjekt "G-Petrol" obavljao je poslovnu djelatnost od 08.01.2016. godine i trenutno je obavlja, a privredni subjekt "NIS PETROL" od 29.01.2016. godine i trenutno je obavlja.

U skladu sa navedenim, utvrđeno je da kupovinom dijela privrednog subjekta "OKTAN PROMET", naftnog terminala "Terminal Popovi", od strane kupca privrednog subjekta "G-Petrol", nije došlo do koncentracije privrednih subjekata, s obzirom da nisu ispunjeni uslovi koje propisuje član 12. Zakona. Naime, u predmetnom slučaju radi se o koncentraciji koja je nastala dana 08.01.2016. godine zaključenjem ugovora o zakupu naftnog terminala "Terminal Popovi" od strane privrednog subjekta "G-Petrol" i koja je kao takva nije prijavljena Konkurencijskom vijeću. Od momenta nastanka koncentracije, pa do zaključenja kupoprodajnog ugovora koji je bio pravni osnov za podnošenje Prijave, nije bilo promjene kontrole nad navedenim naftnim terminalom, na kojem su poslovnu djelatnost tokom cijelog perioda obavljali privredni subjekti "G-Petrol" i "NIS PETROL".

S obzirom da koncentracija privrednih subjekata "G-Petrol" i "OKTAN PROMET" koja se odnosi na naftni terminal "Terminal Popovi", a koja je nastala dana 08.01.2016. godine, nije prijavljena Konkurencijskom vijeću, na način kako je to propisano članom 16. stav (1) Zakona, Konkurencijsko vijeće je utvrđivalo da li je u konkretnom slučaju postojala obaveza učesnika u koncentraciji da je prijave, a u skladu sa članom 14. Zakona.

Obaveza prijave koncentracije, u smislu odredbe člana 14. stav (1) Zakona, nastaje kada učesnici koncentracije prodajom roba i/ili usluga na svjetskom tržištu ostvare prihod u iznosu od 100 miliona KM po završnom računu u godini koja je prethodila koncentraciji, i kada ukupni godišnji prihodi svakog od najmanje dva privredna subjekta učesnika koncentracije ostvareni prodajom roba i/ili usluga na tržištu Bosne i Hercegovine iznose najmanje 8 miliona KM po završnom računu u godini koja je prethodila koncentraciji, ili ako je njihov zajednički udio na relevantnom tržištu veći od 40,0%.

Ukupan godišnji prihod učesnika koncentracije predstavlja prihod (poslovni, finansijski, vanredni i ostali) bez poreza na dodanu vrijednost i drugih poreza koji se direktno odnose na porez i rabat, iskazan posebno za svakog učesnika koncentracije na svjetskom nivou i na tržištu Bosne i Hercegovine, u smislu člana 9. tačka h) Odluke o načinu podnošenja prijave i kriterijima za ocjenu koncentracija privrednih subjekata.

Ukupan godišnji prihod (izražen u KM) učesnika koncentracije privrednog subjekta "G-Petrol", njegovog povezanog društva privrednog subjekta "NIS PETROL" i privrednog subjekta "OKTAN PROMET", ostvaren u 2015. godini, kao godini koja je prethodila koncentraciji, prikazan je u sljedećoj Tabeli:

Tabela

Priv. subjekt	"G-Petrol"	"NIS PETROL"	"OKTAN PROMET"
BiH	(..)** ¹	(..)**	(..)**
Svijet	(..)**	(..)**	(..)**

Izvor: podaci iz Prijave

Prema podacima iz Tabele koncentracija ne ispunjava uslov da ukupni godišnji prihod svakog od najmanje dva učesnika u koncentraciji, ostvaren na tržištu Bosne i Hercegovine u godini koja je prethodila koncentraciji, iznosi najmanje 8 miliona KM, s obzirom da je ukupan godišnji prihod privrednog subjekta "OKTAN PROMET", ostvaren na teritoriji Bosne i Hercegovine u 2015. godini, manji od navedenog iznosa.

Pored uslova vezanog za ukupan prihod učesnika u koncentraciji ostarenog u godini koja je prethodila koncentraciji, Konkurencijsko vijeće je provjeravalo da li su učesnici u koncentraciji ispunili drugi uslov za obaveznu prijavu koncentracije koji se odnosi na njihov zajednički udio na relevantnom tržištu, a koji mora biti veći od 40,0%. S obzirom da se u konkretnom slučaju radi o naftnom terminalu na kojem se obavlja djelatnost trgovine na veliko, analiziran je samo dio relevantnog tržišta koji se odnosi na trgovinu na veliko naftnim derivatima.

¹ podaci predstavljaju poslovnu tajnu u smislu člana 38. Zakona o konkurenciji

Prema podacima iz Prijave, koji su dati na osnovu izvještaja (..)** iz juna 2016. godine, a koji se odnosi na 2015. godinu, stanje tržišnih učešća na tržištu trgovine na veliko naftnim derivatima u Bosni i Hercegovini za 2015. godinu, izkazano po brendovima, je sljedeće:

- 1) Optima/Nestro: (..)**,
- 2) INA: (..)**,
- 3) NIS Gazprom: (..)**,
- 4) Lukoil: (..)**,
- 5) Ostali: (..)**.

Prema podnosiocu Prijave privredni subjekat "OKTAN PROMET" u 2015. godini nije bio prisutan na tržištu trgovine na veliko naftnim derivatima u Bosni i Hercegovini, niti je obavljao djelatnost na naftnom terminalu "Terminal Popovi". Drugi učesnik u koncentraciji privredni subjekt "G-Petrol" i njegovo povezano društvo privredni subjekt "NIS PETROL", kao predstavnici brenda NIS Gazprom, na tom tržištu su u 2015. godini imali učešće od (..)**, što nije dovoljno da bi postojala obaveza prijave koncentracije.

Na osnovu navedenih podataka, utvrđeno je da privredni subjekti "G-Petrol" i "OKTAN PROMET", kao učesnici koncentracije nastale po pravnom osnovu zaključenja ugovora o zakupu naftnog terminala "Terminal Popovi" od 08.01.2016. godine, istu nisu bili u obavezi prijaviti, u skladu sa članom 14. Zakona.

Na osnovu svega navedenog, utvrđeno je da se u premetnom slučaju radilo o kupovini dijelova privrednog subjekta "OKTAN PROMET", benzinskih stanica "BS Trnjaci" i "BS Popovi" i naftnog terminala "Terminal Popovi" od strane privrednog subjekta "G-Petrol", gdje je došlo do promjene vlasništva, ali bez promjene kontrole nad navednim dijelovima, čime nije došlo do koncentracije privrednih subjekata, pa je Konkurencijsko vijeće odlučilo kao u dispozitivu ovog Zaključka.

4. Administrativna taksa

Podnosilac Prijave na ovaj Zaključak, u skladu sa članom 2. Tarifni broj 108. tačka d) Odluke o visini administrativnih taksi u vezi sa procesnim radnjama pred Konkurencijskim vijećem ("Službeni glasnik BiH", br. 30/06 i 18/11) dužan je platiti administrativnu taksu u ukupnom iznosu od 1.000,00 KM u korist Budžeta institucija Bosne i Hercegovine.

5. Pouka o pravnom lijeku

Protiv ovog Zaključka nije dozvoljena žalba.

Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objave ovog Zaključka.

Predsjednica

Adisa Begić

Dostaviti:

- Podnosiocu prijave
- u spis
- a/a